



FUNDACIÓN PÚBLICA GALEGA PARA O APOIO AO EXERCICIO DA CAPACIDADE XURÍDICA

Memoria de actividades- Contas Anuais 2023



ÍNDICE

1. ORIXES

2. SITUACIÓN TRAS A ÚLTIMA MODIFICACIÓN ESTATUTARIA

3. FUNDACIÓN PÚBLICA GALEGA PARA O APOIO AO EXERCICIO DA CAPACIDADE XURÍDICA (FUNGA)

- FINALIDADE
- ÁMBITO DE ACTUACIÓN
- BENEFICIARIOS/AS
- DOMICILIO
- ESTRUTURA ORGANIZATIVA E RECURSOS HUMANOS
- ORGANIZACIÓN INTERNA DO TRABALLO

4. ACTIVIDADE DA FUNGA DURANTE O EXERCICIO 2023

- ACCIÓNS VENCELLADAS DIRECTAMENTE AOS FINS DA FUNDACIÓN
- ACTIVIDADES FUNDACIONAIS
- ACTIVIDADES DE XESTIÓN

5. CONCLUSIÓNS



1. ORIXES

A Fundación Galega para a Tutela de Adultos, foi constituída mediante escritura pública o día 18 de outubro de 1996, ante a necesidade de prestar unha atención persoal, xurídica e patrimonial especializada ás persoas con discapacidade maiores de idade e en situación de desamparo que foran provistas de medidas xudiciais de apoio para o exercicio da súa capacidade xurídica ou que estiveran incursas nun procedemento xudicial de provisión deste tipo de medidas de apoio, e das cales se atribuíse xudicialmente á Xunta de Galicia o seu exercicio.

A Fundación foi clasificada como mixta por Orde da Consellería de Presidencia e Administración Pública do 19 de decembro de 1996 e adscrita ao Protectorado da antedita Consellería.

Foi declarada de interese galego por Orde da Consellería de Presidencia e Administración Pública do 10 de xaneiro de 1997 e inscrita no Rexistro de Fundacións de Interese Galego co número 1996/14.

No ano 2004 modificáronse os seus Estatutos fundacionais, por escritura notarial outorgada en Santiago de Compostela de data 26 de novembro de 2004, co fin de adaptalos ás esixencias normativas.

No ano 2005, por acordo do Padroado, efectuáronse dúas novas modificacións estatutarias, ambas relativas ao artigo 12 dos Estatutos, unha en data 10 de maio e outra o 7 de novembro.

Por orde do 21 de marzo de 2006 modificouse a clasificación da Fundación Galega para a Tutela de Adultos, definíndose como benéfico-social e se adscribiu á Vicepresidencia da Igualdade e do Benestar da Xunta de Galicia como departamento competente para o exercicio das funcións de Protectorado.



Neste mesmo ano 2006 e en xuntanza extraordinaria do Padroado da Fundación celebrada o día 7 de xullo, aprobouse unha nova modificación dos Estatutos da Fundación. Esta modificación comprende, ademais da adecuación dos estatutos da Fundación as novidades legislativas do momento, o cambio de denominación, a ampliación dos fins e a modificación da estrutura dos órganos de goberno e directivos. Tal modificación foi elevada ao Consello da Xunta na súa reunión de data 22 de febreiro de 2007 na que, entre outros, se acordou "Autorizar a modificación dos estatutos da Fundación Galega para a Tutela de Adultos".

Por escritura notarial outorgada en Santiago de Compostela en data 22 de marzo de 2007, procédese a elevar a público a modificación dos estatutos da Fundación, procedéndose posteriormente á súa inscrición no Rexistro Único de Fundacións de Interese Galego.

A partir deste intre, a Fundación Galega para a Tutela de Adultos pasa a denominarse Fundación Galega para o Impulso da Autonomía Persoal e Atención ás Persoas en Situación de Dependencia (FUNGA), aos seus fins engádense actividades relacionadas co impulso da autonomía persoal e coa dependencia e, en base a tal ampliación, modifícase a súa estrutura diferenciándose dentro da Fundación dúas áreas de traballo, a área de tutela (encargada de todas as tarefas vencelladas ao exercicio dos cargos tutelares) e a área de dependencia (á que se lle encomendan todas aquelas actividades vencelladas coa dependencia e autonomía persoal).

No ano 2011 tramitouse un novo proceso de modificación estatutaria cos obxectivos principais de especializar á FUNGA nas tarefas tutelares, a modificación da composición do seu Padroado e o cambio da súa denominación, pasando a chamarse Fundación Pública Galega para a Tutela de Persoas Adultas (FUNGA).

Esta modificación foi acordada polo Padroado da FUNGA na súa reunión extraordinaria de data 3 de maio de 2011, foi autorizada polo Consello da Xunta de Galicia na súa reunión do 12 de maio de 2011 e, tralos trámites e autorizacións pertinentes, elevada a público en data 8 de xuño de 2011 mediante escritura pública outorgada perante o Notario do Ilustre Colexio de Galicia don Nelson Rodicio Rodicio co número 1342 do seu protocolo.

No ano 2012 iniciouse a tramitación dun novo proceso de modificación estatutaria co fin de adaptar a composición do Padroado da FUNGA ás modificacións que na estrutura orgánica das Consellerías da Xunta de Galicia supuxo a entrada en vigor dos seguintes



Decretos: Decreto 194/2011, do 20 de outubro; Decreto 197/2011, do 20 de outubro; Decreto 198/2011, do 20 de outubro; e Decreto 200/2011, do 20 de outubro. Tal adaptación, que supuxo a modificación do artigo 13 dos estatutos da FUNGA, foi acordada polo Padroado da FUNGA na súa xuntanza ordinaria de data 13 de decembro de 2011, autorizada polo Consello da Xunta de Galicia en reunión de data 6 de setembro de 2012 e elevada a público e inscrita no Rexistro Único de Fundacións de Interese Galego no mes de maio do ano 2013.

Unha nova modificación da estrutura orgánica da Xunta de Galicia no ano 2013 abrigou á FUNGA a tramitar un novo proceso de modificación estatutaria co fin de adaptar a composición do Padroado da FUNGA ás modificacións que na estrutura orgánica da Xunta de Galicia produciron a entrada en vigor do Decreto 235/2012, do 5 de decembro, polo que se fixa a estrutura orgánica da Vicepresidencia e das consellerías da Xunta de Galicia e do Decreto 42/2013, do 21 de febreiro, polo que se establece a estrutura orgánica da Consellería de Traballo e Benestar.

Tal adaptación, que supuxo a modificación do artigo 13 dos estatutos da FUNGA (por ser o artigo que regula a composición do seu Padroado), foi aprobada polo Padroado da FUNGA na súa xuntanza extraordinaria de data 24 de abril de 2013, autorizada polo Consello da Xunta de Galicia en reunión de data 12 de decembro de 2013 e elevada a público o 19 de febreiro de 2014 para a súa posterior inscrición no Rexistro Único de Fundacións de Interese Galego.

O Padroado da FUNGA, na súa xuntanza ordinaria de data 17 de decembro de 2019, aprobou un novo proxecto de modificación estatutaria motivada pola necesidade de adaptar a súa composición ás modificacións que na estrutura orgánica da Xunta de Galicia produciron a entrada en vigor do Decreto 116/2015, do 4 de outubro, polo que se modifica a estrutura orgánica da Xunta de Galicia; do Decreto 129/2015, do 8 de outubro, polo que se fixa a estrutura orgánica das consellerías da Xunta de Galicia; e do Decreto 176/2015, do 3 de decembro, polo que se establece a estrutura orgánica da Consellería de Política Social.

Este novo proxecto de modificación estatutaria, que afectou ao artigo 13 dos estatutos da FUNGA por ser o artigo que regula a composición do seu Padroado, foi autorizado polo Consello da Xunta de Galicia o 9 de xullo de 2020, tras acadar os informes favorables



previos preceptivos, e elevado a público por medio de escritura notarial de data 16 de decembro de 2020, para a súa posterior comunicación ao Protectorado de Fundacións e inscrición no Rexistro Único de Fundacións de Interese Galego.

Tras esta modificación, o Padroado estará integrado por 6 membros:

- a) Presidente/a: que será a persoa titular do órgano superior da Xunta de Galicia con competencias nas materias que constitúen os fins fundacionais, que poderá ser substituído/a pola persoa que designe.
- b) Vicepresidente/a: que será a persoa titular do centro directivo ao que figure adscrita a fundación.
- c) Vogais:
 - Persoa titular da Secretaría Xeral Técnica do órgano superior da Xunta de Galicia con competencias nas materias que constitúen os fins fundacionais.
 - Persoa titular do centro directivo con competencias en materia de promoción da autonomía persoal e/ou dependencia.
 - Persoa titular do centro directivo con competencias en materia de Saúde Mental.
 - Persoa titular do centro directivo con competencias en materia de Xustiza.

Ademais, o Padroado terá ao seu servizo un/unha secretario/a, que será designado polo/a presidente/a de entre o persoal funcionario do departamento con competencias nas materias que constitúen os fins fundacionais e que, con carácter preferente, pertencerá ao centro directivo ao que figura adscrita a fundación.



2. SITUACIÓN TRAS A ÚLTIMA MODIFICACIÓN ESTATUTARIA

A entrada en vigor o 03 de setembro do ano 2021 da Lei 8/2021, de 02 de xuño, pola que se reforma a lexislación civil e procesual para o apoio ás persoas con discapacidade no exercicio da súa capacidade xurídica, supuxo a necesidade de modificar novamente os estatutos da fundación para adaptalos ás modificacións introducidas por esta Lei 8/2021, pois afecta á normativa esencial que regula a propia actividade fundacional. Esta Lei introduce importantes novidades na normativa reguladora da materia, eliminando conceptos tan arraigados como a distinción entre capacidade xurídica e capacidade de obrar, institucións como a tutela, procedementos xudiciais como o de modificación da capacidade de obrar das persoas con discapacidade ademais dun importante cambio de paradigma na concepción do sistema de provisión de medidas de apoio ás persoas con discapacidade para o exercicio da súa capacidade xurídica.

A adaptación dos estatutos da FUNGA a esta Lei afectou á mesma denominación da fundación (artigo 1) que pasará a denominarse “Fundación Pública Galega para o Apoio ao Exercicio da Capacidade Xurídica” e aos artigos 3, 6, 7 e 10, artigos esenciais dentro dos estatutos da fundación por ser os que regulan o réxime, misión e fins, funcións, actividades e medios, e identifican ás persoas beneficiarias da labor da fundación.

Esta modificación estatutaria foi autorizada no Consello da Xunta de Galicia na súa reunión de data 14 de decembro de 2023, quedando pendente a súa elevación a público, comunicación ao Protectorado de Fundacións e inscrición no Rexistro Único de Fundacións de Interese Galego, tramitación que se realizará no exercicio 2024.

Posto que este procedemento de modificación estatutaria non se finalizou completamente no exercicio 2023, todas as alusións e remisións que se fagan no presente documento aos estatutos da fundación deberán entenderse realizados aos que estaban en vigor no citado exercicio, con independencia de que se empreguen os conceptos procedentes de conformidade coa Lei 8/2021 anteriormente citada.



3. FUNDACIÓN PÚBLICA GALEGA PARA O APOIO AO EXERCICIO DA CAPACIDADE XURÍDICA (FUNGA).

A **Fundación Pública Galega para o Apoio ao Exercicio da Capacidade Xurídica (FUNGA)**, é unha entidade constituída pola Xunta de Galicia, de interese galego, sen ánimo de lucro, con personalidade xurídica propia que ten afectado de modo duradeiro o seu patrimonio á realización dos fins de interese xeral que se expoñen polo miúdo no artigo 6 dos seus Estatutos.

Está rexida polo seu Padroado, composto na súa totalidade por Altos Cargos da Xunta de Galicia, sendo o principal órgano de xestión a Dirección-Xerencia.

- FINALIDADE

O obxectivo principal da FUNGA consiste en **prestar, previo nomeamento xudicial, as medidas de apoio previstas xudicialmente ás persoas con discapacidade maiores de idade e en situación de desamparo para o exercicio da súa capacidade xurídica e ás persoas incursas nun proceso xudicial de provisión de medidas de apoio ás persoas con discapacidade.**

Tal obxectivo acadarase mediante o cumprimento dos fins de interese xeral que aparecen recollidos no **artigo 6 dos seus estatutos** e que se detallan a continuación:

- 1- A prestación de medidas xudiciais de apoio para o exercicio da capacidade xurídica ás persoas con discapacidade maiores de idade en situación de desamparo, previo nomeamento por parte da autoridade xudicial, mediante:
 - a) A atención e o exercicio das curadorías encomendadas á Fundación pola autoridade xudicial.
 - b) A asunción de defensas xudiciais, tanto nos procesos xudiciais de provisión de medidas de apoio como no resto de supostos contemplados legalmente, previo nomeamento xudicial e sempre referidas a persoas con discapacidade, maiores de idade e en situación de desamparo.
 - c) A administración dos bens das persoas previstas deste tipo de medida de apoio, previo nomeamento xudicial e de conformidade co disposto pola



autoridade xudicial, actuando en beneficio da persoa con discapacidade e baixo os principios de prudencia, conservación e mellora, conforme ao previsto no Código Civil.

- 2- Facilitar o acceso ás actividades de asistencia, prevención, rehabilitación, reinserción, integración socio-laboral e formación, que favorezan a súa integración na comunidade.
- 3- Promover a realización, sexa directa ou indirectamente, de programas que faciliten o desenvolvemento social das persoas provistas de medidas de apoio.
- 4- Orientar e asesorar ás persoas que exerzan este tipo de medidas de apoio e, en xeral, a todas aquelas persoas que demanden información.
- 5- Participar na formación de profesionais relacionados cos servizos sociais de atención ás persoas que precisen este tipo de medidas de apoio para o exercicio da súa capacidade xurídica.
- 6- Fomentar actividades de carácter educativo, técnico, científico e cultural no ámbito vinculado ás medidas de apoio ás persoas con discapacidade para o exercicio da súa capacidade xurídica.
- 7- Impulsar actividades de divulgación e sensibilización social para fomentar o respecto aos dereitos das persoas con discapacidade e a súa maior integración e normalización na sociedade.
- 8- Fomentar accións de patrocinio, solidariedade e financiamento no ámbito das persoas con discapacidade provistas de medidas xudiciais de apoio para o exercicio da súa capacidade xurídica por parte de empresas e entidades públicas e privadas.

Destacar que existe a crenza errónea de que a FUNGA xestiona centros propios polo que solicitan que sexa esta fundación a que asuma o apoio dos seus familiares para así acadarlles praza nun recurso residencial. A FUNGA non dispón de centros propios senón que ten que recorrer á rede pública de centros, nas mesmas condicións que os/as demais solicitantes.



- AMBITO DE ACTUACIÓN

O artigo 5 dos estatutos fundacionais concreta o ámbito territorial no que se desenvolverán as actividades da FUNGA, que será principalmente no ámbito territorial propio da Comunidade Autónoma de Galicia.

- BENEFICIARIOS/AS

As persoas beneficiarias dos servizos da FUNGA deberán reunir as seguintes condicións, todo elo de acordo co artigo 10 dos seus estatutos:

- a) Ser maior de idade.
- b) Residir na Comunidade Autónoma Galega.
- c) Estar provisto de medidas xudiciais de apoio ao exercicio da capacidade xurídica ou estar incurso nun proceso xudicial de provisión deste tipo de medidas de apoio, sendo nomeada xudicialmente a FUNGA para o exercicio das mesmas.
- d) Estar en situación de desamparo, isto é, carecer de persoa no seu entorno familiar e social ou institución para o exercicio das medidas de apoio determinadas xudicialmente ou, de existir, que a autoridade xudicial determine que non son idóneas para o desempeño das mesmas.

Asemade, poderán ser beneficiarias as persoas que, sen estar incluídas nos apartados anteriores, precisen recursos de información, orientación, apoio, intervención e asesoramento individual ou comunitario nas materias propias do ámbito da Fundación.

Así, a FUNGA está a realizar unha importante función de asesoramento no seu ámbito a entidades, profesionais e familiares que requiren tal intervención.

- DOMICILIO

O domicilio social da Fundación radica en Santiago de Compostela (A Coruña), no Edificio Administrativo San Caetano.


Conta cunhas instalacións recentes e adaptadas para o seu equipo técnico, sitas no edif. administrativo CEGADI, R/ Queixume dos Pinos 2, 15705, Santiago Compostela.

O número de teléfono xeral é o 981 95 71 12 e o correo electrónico funga@xunta.gal.



- ESTRUTURA ORGANIZATIVA E RECURSOS PERSOAIS

A estrutura organizativa da FUNGA responde ao seguinte organigrama:



Os recursos humanos cos que contaba a fundación a data 31 de decembro de 2023 estaban dotados de 27 traballadores/as, que se detallan no seguinte cadro:

DIRECCIÓN	1 Director/a Xerente
	1 Coordinador/a.
DEPARTAMENTO XURÍDICO-PATRIMONIAL	8 asesores/as xurídicos/as.
DEPARTAMENTO SOCIAL	7 traballadores/as sociais
DEPARTAMENTO ADMINISTRATIVO	6 administrativos/as de 1ª 4 administrativos/as de 2ª

Tal e como se pode comprobar no anterior cadro, os recursos persoais da FUNGA estaban compostos por **27 persoas** divididas na dirección e tres departamentos interdisciplinarios:



- DEPARTAMENTO XURÍDICO-PATRIMONIAL: Este departamento estivo **composto por oito asesores/as xurídicos/as** dos cales seis realizaron tarefas de asesoría xurídica xeral e dúas tarefas de contido patrimonial, é dicir, que na práctica e como método de organización do traballo, existen dúas subdivisións dentro deste departamento diferenciadas pola natureza do traballo que se deriva a cada unha delas e polas funcións concretas que desempeñan:
 - Asesoría Xurídica Xeral: Terá encomendadas as seguintes funcións:
 - Solicitud de particulares aos Xulgados.
 - Traslado a Asesoría Xurídica da Xunta dos expedientes pertinentes.
 - Elaboración dos inventarios de bens.
 - Acreditación ante as entidades bancarias nas que as persoas provistas de medidas de apoio desempeñadas pola FUNGA teñan produtos financeiros.
 - Contestar aos requirimentos efectuados polo Xulgado.
 - Solicitud de autorización xudicial para internamentos en centros, no caso de que fose recomendable tal ingreso, así como de auxilio xudicial nos casos nos que fose preciso.
 - Comunicar ao Xulgado os cambios de domicilio das persoas provistas de medidas de apoio, así como calquera outra incidencia na súa vida da que se deba dar conta. Poñer en coñecemento do Xulgado e das forzas do orde público, a desaparición ou non localización dalgunha destas persoas, e posteriormente a súa localización.
 - Solicitar as autorizacións necesarias, establecidas polo artigo 287 do código civil.
 - Solicitar a retribución legalmente establecida nos casos que proceda.
 - Elaboración e presentación das rendicións anuais e rendicións xerais xustificadas de contas preceptivas.
 - Presentación de recursos.



- Asistencia aos Xuízos que afecten ás persoas beneficiarias e nos que se cite á FUNGA.
- Reunións con letrados/as.
- Estudio da situación patrimonial da persoa con discapacidade e traslado do mesmo á asesoría xurídica patrimonial.
- Atender aos asuntos xurídicos (penais, civís, etc) das persoas provistas de medidas de apoio neste eido, solicitando, no caso de ser preciso, o beneficio da xustiza gratuíta.
- Atender as consultas telefónicas e presenciais.
- Comunicar, cando proceda, aos organismos oficiais que corresponda o falecemento das persoas provistas de medidas de apoio.
- Reunións con Xuíces e Fiscais para lograr unha mellor coordinación nas tarefas a desenvolver pola Fundación.
- Contacto persoal e telefónico co persoal dos Xulgados co fin mellorar o seguimento dos procedementos xudiciais afectados pola medida de apoio.
- Asesoría Xurídica Patrimonial:
 - Participación na xestión das herdanzas nas que estean interesados as persoas con medida de apoio neste eido, mediante:
 - Averiguación das datas de defunción do/a causante e matrimonio se existe.
 - Averiguación dos/as familiares interesados/as na sucesión.
 - Averiguación do patrimonio obxecto da herdanza.
 - Solicitud de certificados aos rexistros civís e últimas vontades.
 - Se existe testamento, solicitude do mesmo.
 - Preparación nas Notarias das distintas escrituras en función da situación existente (se hai testamento ou non).
 - Asistencia xudicial nos procedementos de divisións xudiciais de herdanzas, solicitando no seu caso xustiza gratuíta.
 - Intervención nos procedementos de liquidación de sociedades de gananciais.
 - Tramitacións de vendas de bens das persoas con medida de apoio con este contido e nos casos precisos, o que supón:
 - Localización física do ben.



- Peritaxe do mesmo.
 - Tramitación do procedemento xudicial preceptivo para acadar a autorización xudicial precisa para executala venta, de acordo co establecido no Código Civil.
 - Localización de potenciais compradores así como dar traslado das ofertas presentadas polos mesmo ao Xulgado competente.
 - Tramitación da venta e de toda a documentación, privada e pública, vencellada á mesma.
- **DEPARTAMENTO SOCIAL:** Este departamento estivo **composto por sete traballadores/as sociais**, que tiveron encomendadas as seguintes funcións:
- Atención persoal e directa dos/as beneficiarios/as coa finalidade de coñecer a súa situación persoal.
 - Desprazamentos ós domicilios das persoas ou centros residenciais.
 - Realización do informe social pertinente e valoración social do caso.
 - Proposta do plan de actuación social.
 - Xestión e tramitación de todo tipo de recursos sociais (públicos ou privados) encamiñados á integración, promoción da autonomía e consecución do benestar das persoas provistas da medida de apoio, tales como:
 - Solicitud de prestacións e axudas así como de prazas en centros residenciais.
 - Tramitación de recursos, tales como servizos de axuda a domicilio.
 - Realización de cantos informes sociais sexan solicitados por institucións e organismos (xulgado, fiscalía, recursos sociais ou sanitarios, etc).
 - Traballo directo co usuario, o que se concreta en:
 - Realizar visitas periódicas ó domicilio para valorar e intervir na situación social e/ou familiar e incluír as variables necesarias.
 - Manter contacto telefónico, persoal e postal.
 - Atención de todo tipo de demandas que podan formular: afectivas, económicas, de apoio, consultas, etc.
 - Dar apoio en determinados aspectos da vida diaria.



- Realizar propostas individualizadas sobre a distribución dos seus recursos económicos (pensións, aforros...) atendendo ás súas necesidades, e explicarlles dita situación.
 - Propoñer internamentos (involuntarios) en institucións tanto de tipo sanitario como residencial, se así se considera oportuno, así como valorar a conveniencia de manter dito internamento en determinadas ocasións.
 - Informar, asesorar e prestar apoio a nivel social aos familiares das persoas provistas de medidas de apoio en temas relacionados co exercicio das medidas de apoio.
 - Informar e asesorar sobre aspectos sociais dentro do ámbito das medidas de apoio ás persoas con discapacidade para o exercicio da súa capacidade xurídica a outros profesionais.
- DEPARTAMENTO ADMINISTRATIVO: Estivo formado por **dez traballadores/as**, que tiveron encomendadas as seguintes funcións:
- Xestión das contas bancarias das persoas provistas de medidas de apoio que teñan este contido, concepto no que se inclúe:
 - Control de todos os movementos bancarios existentes nas contas, tanto ingresos como cargos.
 - Seguimento das inversións realizadas por estas persoas (valores, accións, contas de aforro...).
 - Realización de estudos e propostas de inversión dos aforros dos/as beneficiarios/as (en produtos financeiros sen risco algún para o patrimonio investido, tales como contas de aforro a prazo fixo) e seguimento da evolución destes produtos financeiros.
 - Actualización permanente de toda a información económico – financeira dos/as beneficiarios/as.
 - Redacción de ordes de pago e autorización de cargos ou domiciliacións así como o control da correcta execución dos mesmos.
 - Identificación de todos os gastos e ingresos correntes e regulares, tanto os existentes de forma previa á asunción da medida de apoio pola FUNGA como os xerados posteriormente, vixiando a súa correcta execución, así



como informar sobre a súa necesidade propoñendo, no seu caso, a suspensión dos mesmos.

- Facer un seguimento do axeitado cumprimento das obrigas fiscais.
- Atención telefónica aos/ás beneficiarios/as, familiares e interesados/as con relación aos temas de contido administrativo.
- Atención da centraliña telefónica.
- Recibimento das persoas que acuden ás oficinas da Fundación.
- Xeración e organización dos expedientes, tanto de xeito físico como informático.
- Cumprimentación dos rexistros de entrada e saída de documentación.

- ORGANIZACIÓN INTERNA DO TRABALLO

Dado que as tarefas dos distintos departamentos son interdependentes (todas as persoas precisan da intervención de profesionais de cada un dos tres departamentos), non se pode concibir un funcionamento illado e independente de cada un deles, sendo imprescindible que actúen de xeito coordinado e baixo unha comunicación permanente. Deste xeito, o método empregado para ligar aos tres departamentos é a creación de equipos multidisciplinares formados por membros dos tres departamentos, equipos que deste xeito prestarán unha atención íntegra.

Existen así **seis equipos multidisciplinares**, empregándose como parámetro para a distribución e adxudicación do traballo entre estes equipos o criterio territorial (en función da localización do Xulgado que entendeu do procedemento de provisión das medidas de apoio e ditou a correspondente resolución).

Fora destes seis equipos, existen unha serie de profesionais non vinculados/as por este criterio territorial e que realizan as súas funcións como parte dos seis equipos multidisciplinares, a saber: dúas asesoras xurídicas vencelladas á parte patrimonial do departamento xurídico, unha traballadora social dedicada principalmente á tramitación de pensións e das xestións relacionadas coa lei de dependencia e catro administrativos/as.



4. ACTIVIDADE DA FUNGA DURANTE O EXERCICIO 2023

Dentro deste punto analizaremos a actividade executada pola Fundación durante o exercicio 2023, encadrando as accións concretas levadas a cabo en tres grupos de actuacións en función do contido da acción realizada.

- ACCIÓNS VENCELLADAS DIRECTAMENTE AOS FINS DA FUNDACIÓN
 - Medidas de apoio a persoas con discapacidade para as que foi nomeada a FUNGA ano 2023

Seguindo coa evolución histórica e tendencia rexistrada dende o mesmo inicio da actividade da fundación, o número de persoas con discapacidade que recibiron os apoios prestados por esta Fundación segue sendo considerable, debido fundamentalmente ó desarraigo familiar e ao envellecemento da poboación.

No seguinte cadro expónse a evolución anual do número de persoas con discapacidade con apoio da FUNGA nos últimos anos, diferenciándose polo tipo de apoio que se lles presta.

MEDIDAS DE APOIO	2012	2013	2014	2015	2016	2017	2018	2019	2020	2021	2022	2023
CURADORÍAS	1375	1562	1748	1937	2084	2108	2213	2362	2370	2510	2601	2588
DEFENSAS XUDICIAIS	485	588	588	631	715	696	891	891	406	411	418	489
ADM. BENS	11	17	28	37	39	39	40	37	51	45	39	38
TOTAL ACTIVOS	1871	2167	2364	2605	2838	2843	3144	3290	2827	2966	3058	3115
FALECIDOS	110	112	138	151	151	211	158	188	211	246	234	236
BAIXAS	87	116	116	113	88	127	136	288	560	314	114	120
TOTAL	2068	2395	2618	2869	3077	3181	3438	3766	3598	3526	3406	3471


Con respecto aos datos contidos na anterior táboa, debemos especificar que se refiren ao peche de cada exercicio, é dicir, a data 31 de decembro de cada ano. Sendo isto así, o número de beneficiarios/as existentes no inicio de cada exercicio (01 de xaneiro)



correspóndese co número de "total activos" do ano anterior reflectidos na táboa, é dicir, o número total de beneficiarios/as a 31 de decembro do ano anterior descontando as persoas falecidas ou que causaron baixa por outros motivos. Deste xeito, **o incremento do número de persoas con discapacidade ás que a FUNGA lles presta apoio experimentado no ano 2023 cífrase en 413 novas persoas** (diferencia entre as 3.058 persoas existentes a data 01/01/2023 e as 3.471 a data 31/12/2023).




Por outra parte aclarar que, a diferenza dos datos facilitados noutros exercicios, nesta táboa non se contabilizan as "pretutelas", por considerar que non se poden entender como unha medida de apoio ao exercicio da capacidade xurídica de acordo co establecido na Lei 8/2021, de 02 de xuño, pola que se reforma a lexislación civil e procesual para o apoio ás persoas con discapacidade no exercicio da súa capacidade xurídica, motivo polo cal as cifras sofren unhas pequenas diferencias.

Na seguinte gráfica reflíctese o incremento anual do número de persoas beneficiarias da FUNGA experimentado dende o ano 1997:





A distribución xeográfica provincial das persoas beneficiarias correspóndese co exposto nas seguintes gráficas:





- Accións de formación, información, divulgación e sensibilización dos dereitos das persoas maiores de idade con discapacidade.

Co fin de fomentar o coñecemento que tanto os profesionais do sector como a poboación en xeral teñen da FUNGA e das súas funcións e de todo o referido ao proceso xudicial de provisión de medidas de apoio ás persoas con discapacidade para o exercicio da súa capacidade xurídica, das figuras de apoio e dos dereitos das persoas maiores de idade con discapacidade, a FUNGA facilitou información e asesoramento a un importante número de persoas que se interesaron por esta realidade, tanto nas instalacións da fundación como acudindo aos actos formativos e informativos aos que foi convidada.

- ACTIVIDADES FUNDACIONAIS

- Acordos e convenios de colaboración

Durante o período analizado a FUNGA mantivo varios acordos e convenios de colaboración con distintas entidades:

1º- Convenio de colaboración asinado coa "Fundación Santiago Apostol de Ciencias Sociais" (entidade xurídica responsable da Escola Universitaria de Traballo Social de Santiago de Compostela) para o desenvolvemento da formación na FUNGA do alumnado de traballo social mediante a realización do pertinente programa de prácticas.

2º- Convenio de colaboración asinado coa "Fundación Aldaba" para participar no proxecto de voluntariado a través de equipos de proximidade para facilitar asistencia e colaboración a persoas con discapacidade, desenvolvido pola "Fundación Aldaba" na Comunidade Autónoma de Galicia.

3º- Convenio de colaboración co COTSG (Colexio Oficial de Diplomados en Traballo Social e Asistentes Sociais de Galicia) para o emprego da queda de servizos profesionais independentes.



- Establecemento de acordos e protocolos con diversos centros residenciais para mellorar, facilitar e axilizar os ingresos e atención dos beneficiarios/as.
-
- ACTUACIÓNS DE XESTIÓN
 - Actualización da páxina web.
 - Arquivo dixital:

Durante o ano 2023 continuouse coa promoción da dixitalización da documentación e do seu arquivo, acadándose importantes reducións de consumo de papel así como do espazo físico necesario para o proceso de arquivo.

- Arquivo físico:

Neste exercicio continuouse coa mellora do arquivo físico, en atención ás necesidades da Fundación.

- Implantación do Sistema de Calidade:

Durante o ano 2023 continuouse coa aplicación das actividades enmarcadas no Sistema de Calidade na FUNGA, actividades que consistiron na aplicación dos manuais, procedementos, rexistros e protocolos existentes así como na súa renovación, co obxectivo de facilitar e simplificar o traballo e mellorar o servizo prestado pola FUNGA aos/ás seus/súas usuarios/as.



5. CONCLUSIÓNS.

Tal e como nos indican os datos e gráficos contidos na presente memoria, no exercicio 2023 **incrementouse o número de persoas con discapacidade que recibiron o apoio prestado pola FUNGA en 413 novas persoas**. Tal incremento debemos poñelo en valor posto que constitúe a principal función da fundación, pero tamén debemos destacar o importante número de persoas que tamén foron neste período beneficiarias doutras actuacións levadas a cabo pola FUNGA. Así, debemos destacar:

- As colaboracións levadas a cabo con diversas entidades e asociacións.
- A actividade de asesoramento, presencial ou telefónico, que dende a FUNGA se veu prestando ao longo do ano 2023 a todas aquelas persoas que requiriron este servizo, tales como profesionais relacionados con este ámbito (profesionais do eido social, xurídico, financeiro...), familiares de persoas con discapacidade ou incursas no proceso xudicial de provisión de apoios, familiares de persoas susceptibles de ser obxecto deste proceso por existir indicios de ser precisa tal actuación, etc.

Para a execución de todas estas actividades e chegar a un número tan amplo de beneficiarios/as, foi necesario o gran esforzo realizado polo persoal da Fundación, a aplicación eficiente dos recursos cos que contou a Fundación durante o período, o emprego de ferramentas tales como a páxina web (para facilitar o acceso á información ás persoas que optaron por este medio para aclarar as súas dúbidas e curiosidades), e o fomento do emprego no traballo diario de instrumentos que o axilicen e racionalicen, tales como o arquivo dixital, o seguimento dun Sistema de Calidade, etc.

É indiscutible a necesidade e incidencia de todas estas medidas nos resultados obtidos, pero tamén debemos destacar a importantísima colaboración que se logrou de distintos entes e institucións, tanto públicos coma privados, instrumentalizada a través de acordos e convenios de colaboración ou simplemente non formalizada pero igual de valiosa e imprescindible.

Podemos resumir o labor da FUNGA no intento de mellorar a protección e calidade de vida daquelas persoas que, por determinadas circunstancias, precisan dunha serie de apoios para mellorar a súa situación vital, pero resulta obvio que tal obxectivo, polo seu alcance, non pode ser acadado unicamente coa actuación individual dun organismo concreto, senón que require da actuación conxunta e coordinada de todos os entes e



institucións implicadas ou con competencias neste ámbito, razón pola cal se valora tan positivamente a actuación conxunta, a colaboración e traballo en equipo desempeñado durante este exercicio.

A FUNGA sitúase, deste xeito, como referente no eido do exercicio de medidas de apoio ás persoas con discapacidade maiores de idade nosa Comunidade, tanto mediante o exercicio directo dos apoios a aquelas persoas que se atopan en situación de desamparo, tras o oportuno nomeamento xudicial, como a través dos servizos de formación, información e asesoramento que presta a todas aquelas persoas vencelladas a esta realidade, entre os/as que se atopan diversos/as profesionais e persoas físicas e xurídicas que están a exercer estes apoios de forma independente.

Por todo elo podemos afirmar que a FUNGA desempeña unha función **necesaria e indispensable** na nosa sociedade, pois sen a mesma non existiría figura similar que puidese asumir de forma xenérica as medidas de apoio encomendadas, posto que, aínda que existen outras entidades con este mesmo cometido na nosa Comunidade, teñen delimitados/as os/as seus/súas potenciais beneficiarios/as a aquelas persoas cun perfil determinado. Máis aínda, tendo en conta que a previsión para os vindeiros anos é que se siga con esta progresión e que se incremente o número de persoas que precisen da prestación deste tipo de medidas de apoio, debido fundamentalmente ao envellecemento da poboación galega e ao aumento do número de persoas diagnosticadas de enfermidades mentais, todo isto agravado polo desarraigo familiar existente na nosa sociedade en relación con estes sectores de poboación.